



REPUBLIKA E SHQIPËRISË
KËSHILLI I EMËRIMEVE NË DREJTËSI

V E N D I M

Nr. 8, datë 05.04. 2022

PËR PËRFUNDIMIN E PROCEDURËS SË VERIFIKIMIT TË ZOTIT SANDËR BECI NË VENDIN VAKANT PËR GJYQATAR NË GJYKATËN KUSHTETUESE, SHPALLUR NGA PRESIDENTI I REPUBLIKËS NË DATEN 13.01.2022

Këshilli i Emërimeve në Drejtësi, i përbërë nga:

Sokol Binaj	Kryetar
Marsida Xheferllari	Zëvendëskryetare
Elsa Toska	Anëtare relatore
Edlira Petri	Anëtare
Etien Kapo	Anëtar
Klodiana Mema	Anëtare
Genti Xholi	Anëtar zëvendësues
Thoma Jano	Anëtar zëvendësues

Asistuar nga sekretare Ermelinda Kadiu, me praninë e Avokates së Popullit, zonjës Erinda Ballanca, në cilësinë vëzhguesit të përhershëm të mbledhjeve dhe veprimtarisë së Këshillit të Emërimeve në Drejtësi (KED), të përfaqësuesve të autorizuar të subjekteve të ftuara sipas ligjit për pjesëmarrje, në cilësinë e vëzhguesve: zotit Bledar Dervishaj, përfaqësuesit i autorizuar i Presidentit të Republikës, dhe - zonjës Mimoza Arbri, përfaqësuese e autorizuar e Kryetarit të Kuvendit, në mbledhjen e datës 05.04.2022, mori në shqyrtim çështjen që i përket:

KANDIDATIT: Sandër Beci

OBJEKTI: Kandidim për gjyqtar në Gjykatën Kushtetuese në vendin vakant të shpallur nga Gjykata e Lartë në datën 21.02.2019, 19.04.2019, 03.06.2021 dhe rishpallur në datë 15.11.2021.

KËSHILLI I EMËRIMEVE NË DREJTËSI

Pasi dëgjoji relatimin e anëtares së KED, zonjës Elsa Toska, mendimin e paraqitur nga Avokati i Popullit, zonja Erinda Ballanca, në cilësinë e vëzhgueses së përhershme në mbledhjen dhe veprimtarinë e Këshillit të Emërimeve në Drejtësi, lidhur me mënyrën e procedimit të ndjekur për verifikimin e kandidatit, dhe si bisedoi çështjen në tërësi,

VËREN:

I. Rrethanat e çështjes

1. Në zbatim të nenit 125 të Kushtetutës dhe të pikës 1 të nenit 7/c të Ligjit nr. 8577/2000 “Për organizimin dhe funksionimin e Gjykatës Kushtetuese në Republikën e Shqipërisë” (në vijim ligji nr. 8577/2000), Presidenti i Republikës, në datën 13.01.2022, ka shpallur hapjen e procedurës së aplikimeve për plotësimin e vendit vakant, vakancë e plotë, të krijuar në Gjykatën Kushtetuese pas mbarimit të mandatit të gjyqtarit z. Përparim Kalo.

2. Në përfundim të procedurës së aplikimeve për shprehjen e interesit për kandidim, Presidenti i Republikës i ka dërguar Këshillit të Emërimeve në Drejtësi aplikimet e kandidatëve të shoqëruara me dokumentet e paraqitura prej tyre për përmbushjen e kushteve dhe kriterëve ligjore të përcaktuara në nenin 7/a të ligjit nr. 8577/2000, ku rezultoi kandidat, edhe z. Sandër Beci, (“kandidati”).

3. Në zbatim të nenit 228 të Ligjit nr. 115/2016 dhe të pikave 5, 27 deri 37 dhe 41 të aktit nënligjor normativ, Vendimit nr. 2, datë 15.02.2019 të KED, si edhe të pikës 4 të Vendimit nr. 4 datë 11.03.2019 të KED, në mbledhjen së zhvilluar në datën 14.02.2022, është realizuar edhe procedura për caktimin me short manual të relatorëve për vendin vakant të krijuar në Gjykatën Kushtetuese.

4. Sipas rezultatit të shortit manual të realizuar nga Këshilli i Emërimeve në Drejtësi, lidhur me vendin vakant në Gjykatën Kushtetuese, të shpallur nga Presidenti i Republikës në datën 13.01.2022, relator për ndjekjen e procedurave të verifikimit, vlerësimit, pikëzimit dhe renditjes së kandidaturave, është caktuar anëtarja e Këshillit, znj. Elsa Toska, ndërsa këshilltare ligjore, znj. Laureta Nezaj dhe Aulona Bodo.

5. Z. Sandër Beci, si njëri ndër kandidatët që ka shprehur interesin për vendin vakant të sipërcituar në Gjykatën Kushtetuese, në zbatim të pikës 22 të Vendimit nr. 4, datë 11.03.2019 të KED, është njoftuar me shkrim për t’u paraqitur pranë Këshillit për të vijuar me përmbushjen e procedurave të verifikimit të kandidaturës. Njoftimi me shkrim datë 15.02.2022, është kryer në rrugë elektronike në adresën e deklaruar nga vetë kandidati, si dhe gjendet i administruar në dosjen e kandidimit.

6. Në datën 15 mars 2022, kandidati z. Sandër Beci, u zgjodh nga Mbledhja e Posaçme e gjyqtarëve të Gjykatës së Lartë, sipas nenit 125 pika 1 e Kushtetutës, për vendin vakant të anëtarit të Gjykatës Kushtetuese. Në vijim, në datën 23.03.2022, Presidenti i Republikës zhvilloi ceremoninë për betimin e z. Sandër Beci, në cilësinë e anëtarit të Gjykatës Kushtetuese, dhe për rrjedhojë ai fillon detyrën e anëtarit të Gjykatës Kushtetuese.

7. Me datë 23.03.2022, duke qene se kandidati kishte bërë betimin pranë Presidentit të Republikës në cilësinë e anëtarit të Gjykatës Kushtetuese të zgjedhur nga Gjykata e Lartë, i është kërkuar konfirmimi i qëndrimit për tërheqjen nga dy vakancat e tjera.

8. Në përgjigje të këtij e-mailin e datës 24.03.2022, kandidati Sandër Beci, ka sqaruar si vijon: *“Duke ju falenderuar për urimin dhe mirëkuptimin që kemi patur në të gjithë komunikimin tonë, Ju bëj me dije se për shkak të zgjedhjes sime në Gjykatën Kushtetuese, heq dore nga kandidimi në dy vakancat e tjera të kësaj Gjykate për të cilat kam shprehur interesin”*.

9. Tërheqja nga kandidimi është një e drejtë që i njihet kandidatit në pikën 8 të vendimit nr. 4, datë 11.03.2019, të KED-së, e cila parashikon shprehimisht:

“8. Kandidati ka të drejtë të tërhiqet në çdo kohë nga kandidimi, duke e njoftuar me shkrim Këshillin. Pas këtij njoftimi, Këshilli vendos menjëherë përfundimin e procedurës së verifikimit të kandidatit. Akti i Këshillit për konstatimin e tërheqjes nga kandidimi i njoftohet menjëherë kandidatit dhe bëhet publik në faqen zyrtare të Gjykatës së Lartë, në pjesën e caktuar për Këshillin e Emërimeve në Drejtësi”.

10. Ndërsa, në pikën 31 të të njëjtit vendim, parashikohen veprimet e relatorit që pasojnë njoftimin e tërheqjes nga kandidimi dhe konkretisht:

“31. Kur kandidati njofton tërheqjen nga kandidimi, relatori përgatit relacionin që përshkruan procedurën e zhvilluar dhe projekt-aktin mbi përfundimin e procedurës administrative të verifikimit të kandidatit të tërhequr, duke e dërguar menjëherë për shqyrtim në mbledhjen e Këshillit”.

11. Sa më sipër, më datë 24.03.2022 është përgatitur ky relacion që përshkruan procedurën e zhvilluar, që shoqërohet edhe nga projekt-akti për përfundimin e procedurës së kandidimit të kandidatit Sandër Beci për vendin vakant, në Gjykatën Kushtetuese, të shpallur nga Presidenti i Republikës në datë 13.01.2022. Këto akte i paraqiten për shqyrtim dhe vendimmarje mbledhjes së KED-së.

12. Kryetari i KED-së, në bazë të pikës 33 të vendimit nr. 4/2019 të KED-së, ka thirrur mbledhjen, duke njoftuar anëtarët për zhvillimin e saj më datë 05.04.2022, rendin e ditës, si edhe duke i bashkëlidhur njoftimit materialet e çështjes. Në rendin e ditës është përfshirë edhe çështja me objekt ndërprerjen e procedurës administrative të verifikimit të kandidimit të Z. Sandër Beci, për vendin vakant për gjyqtar në Gjykatën Kushtetuese, shpallur nga Presidenti i Republikës në datë 13.01.2022.

13. Pas komunikimit me kryetarin e KED-së dhe caktimit të mbledhjes, në rrugë elektronike i njoftohet zhvillimi i mbledhjes dhe kandidatit Sandër Beci, duke i dërguar edhe kopje e këtij relacioni. Njoftimi i tij kryhet në zbatim të pikës 34 të vendimit nr. 4/2019 të KED-së, duke administruar një kopje të njoftimit në dosjen e kandidatit.

14. I njëjti njoftim, së bashku me dokumentacionin e përgatitur nga relatori mbi veprimet e kryera gjatë procedurës së verifikimit, si edhe materialet të çështjes, i dërgohen edhe Avokatit të Popullit. Kopje e këtij njoftimi administrohet gjithashtu në dosjen e kandidatit.

15. Koha e zhvillimit të mbledhjes, rendi i ditës dhe relacioni i përgatitur për kandidatin Sandër Beci i njoftohen edhe subjekteve, të cilët sipas ligjit ftohen të marrin pjesë në mbledhjen e KED-së. Edhe kopjet e këtyre njoftimeve administrohen në dosjen e kandidatit.

16. Gjithashtu, dita dhe ora e zhvillimit të mbledhjes së KED-së, si dhe rendi i ditës publikohen në faqen zyrtare të Gjykatës së Lartë, në pjesën e caktuar për Këshillin e Emërimeve në Drejtësi.

17. Në mbledhjen e Këshillit, pas relatimit të çështjes nga anëtari relator dhe shpjegimeve mbi pyetjet sqaruese të drejtuara nga anëtarët e tjerë të KED-së, kjo e fundit dëgjo mendimin e Avokatit të Popullit lidhur me mënyrën e procedimit të ndjekur për verifikimin e kandidatit Sandër Beci.

18. Në thelb, Avokati i Popullit parashtroi se:

Rezulton se shkak për ndërprerjen e procedurës ashtu dhe shkak i rënies së interesit të kandidatit Sandër Beci është i qartë, përse kohë që tashmë është anëtar i Gjykatës Kushtetuese.

II. Vlerësimi i Këshillit të Emërimeve në Drejtësi

19. KED-ja, duke pasur parasysh dispozitat ligjore dhe ato nënligjore normative të sipërcituara, bazuar në relacionin dhe aktet e dërguara nga relatori i caktuar për ndjekjen e procedurave për vendin vakant në Gjykatën Kushtetuese të shpallur nga Presidenti i Republikës në datë 13.01.2022, vlerëson se duhet të procedojë me vendim për përfundimin e procedurës së verifikimit, vlerësimit, pikëzimit dhe renditjes së kandidatit Sandër Beci.

20. Në pikën 1 të nenit 7/ç të ligjit nr. 8577/2000 parashikohet se për plotësimin e vendeve vakante që krijohen në Gjykatën Kushtetuese, Kryetari i Gjykatës së Lartë: *"1. shpall në mjetet e informimit publik dhe në faqen zyrtare të internetit hapjen e procedurës së aplikimit. Kryetari i Gjykatës së Lartë pranon kandidaturat brenda 30 ditëve nga njoftimi, i bën ato publike dhe ia dërgon Këshillit të Emërimeve në Drejtësi..."*.

21. Në zbatim të nenit 7/ç të ligjit nr. 8577/2000 dhe të nenit 234 e vijues të ligjit nr. 115/2016, pas dërgimit të listës së kandidatëve që kanë shprehur interes së bashku me dokumentacionin e paraqitur, për vendin vakant në Gjykatën Kushtetuese të shpallur nga Presidenti i Republikës në datë 13.01.2022, KED ka filluar në datën 15.02.2022 procedurën e verifikimit të kandidaturave për plotësimin e kushteve dhe kriterëve të kandidimit që parashikohen nga Kushtetuta dhe ligji.

22. Ligji nr. 8577/2000 dhe ligji nr. 115/2016 nuk parashikojnë në mënyrë të shprehur rastin e mosparaqitjes apo të tërheqjes nga kandidimi dhe mënyrën e disponimit të KED-së në raste të tilla. Nga ana tjetër, ligji nr. 115/2016, në pikën 2 të nenit 229, parashikon se: *"2. Këshilli i Emërimeve në Drejtësi, për të siguruar zhvillimin e një procedure transparente, publike dhe bazuar në merita, me vendim, miraton rregulla më të detajuara për përzgjedhjen dhe*

pikëzimin e kandidatëve, duke përfshirë edhe rregullat për procedurën e verifikimit të pasurisë, integritetit dhe të së shkuarës profesionale dhe personale të tyre.”.

23. Mbi bazën e këtij autorizimi ligjor, KED ka nxjerrë vendimin nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, i ndryshuar. Në pikat në pikat 8 dhe 31 të këtij vendimi parashikohet se:

“8. Kandidati ka të drejtë të tërhiqet në çdo kohë nga kandidimi, duke e njoftuar me shkrim Këshillin. Pas këtij njoftimi, Këshilli vendos menjëherë përfundimin e procedurës së verifikimit të kandidatit. Akti i Këshillit për konstatimin e tërheqjes nga kandidimi i njoftohet menjëherë kandidatit dhe bëhet publik në faqen zyrtare të Gjykatës së Lartë, në pjesën e caktuar për Këshillin e Emërimeve në Drejtësi”.

“31. Kur kandidati njofton tërheqjen nga kandidimi, relatori përgatit relacionin që përshkruan procedurën e zhvilluar dhe projekt-aktin mbi përfundimin e procedurës administrative të verifikimit të kandidatit të tërhequr, duke e dërguar menjëherë për shqyrtim në mbledhjen e Këshillit”.

24. KED-ja, në zbatim të dispozitave ligjore dhe nënligjore, të zbatueshme në rastin e mosparaqitjes dhe tërheqjes nga kandidimi, vlerëson të rregullt procedurën e ndjekur deri tani për verifikimin e kandidaturës së kandidatit Sandër Beci. Kandidati është njoftuar rregullisht për vijimin e kësaj procedure, sipas rrugës elektronike në datë 15.02.2022.

25. Në datën 15 mars 2022, kandidati z. Sandër Beci, u zgjodh nga Mbledhja e Posaçme e gjyqtarëve të Gjykatës së Lartë, sipas nenit 125 pika 1 e Kushtetutës, për vendin vakant të anëtarit të Gjykatës Kushtetuese. Në vijim, në datën 23.03.2022, Presidenti i Republikës zhvilloi ceremoninë për betimin e z. Sandër Beci, në cilësinë e anëtarit të Gjykatës Kushtetuese, dhe për rrjedhojë ai fillon detyrën e anëtarit të Gjykatës Kushtetuese.

26. Me kërkesë të KED-së, të dërguar në rrugë elektronike për të konfirmuar mungesën e interesit për konkurimin e mëtejshëm në vakancat e tjera, z. Sandër Beci me e-mailin e datës 24.03.2022, është shprehur se: *“Duke ju falenderuar për urimin dhe mirëkuptimin që kemi patur në të gjithë komunikimin tonë, Ju bëj me dije se për shkak të zgjedhjes sime në Gjykatën Kushtetuese, heq dorë nga kandidimi në dy vakancat e tjera të kësaj Gjykate për të cilat kam shprehur interesin”.*

27. KED-ja vlerëson të rregullt procedurën e njoftimit për fillimin e procedurës së verifikimit, si dhe në aspektin e qartësisë së vullnetit të shprehur prej kandidatit Sandër Beci për tërheqjen nga kandidimi.

28. KED-ja vlerëson se, shprehja e interesit dhe kandidimit për plotësimin e vendeve vakante që krijohen në Gjykatën Kushtetuese është një e drejtë, e cila ushtrohet nga kandidatët ekskluzivisht mbi vullnetin individual të tyre, duke respektuar procedurat, kushtet dhe kriteret e kandidimit që parashikon Kushtetuta dhe ligji.

29. Në rast se personi që kandidon, në çdo kohë e gjendje të procedimit, shpreh vullnetin për të mos vijuar më tej me kandidimin për plotësimin e vendit vakant që krijohet në Gjykatën Kushtetuese, atëherë nuk ka më vend të vijojnë procedurat e verifikimit, vlerësimit, pikëzimit dhe renditjes së kandidaturës, të parashikuara nga ligji dhe aktet nënligjore të nxjerra në bazë e për zbatim të tyre.

PËR KËTO ARSYE:

Në mbështetje të pikës 1 të nenit 149/d të Kushtetutës, të 7/c të ligjit nr. 8577/2000, “Për organizimin dhe funksionimin e Gjykatës Kushtetuese të Republikës së Shqipërisë”, i ndryshuar, të pikës 3 të nenit 229 të ligjit nr. 115/2016, “Për organet e qeverisjes së sistemit të drejtësisë”, i ndryshuar, si edhe pikave 8, 28, 31, 78 të vendimit të KED-së nr. 4, datë 11.03.2019, “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, i ndryshuar, Këshilli i Emërimeve në Drejtësi,

V E N D O S I:

1. Ndërprejjen e procedurës së verifikimit, vlerësimit, pikëzimit dhe renditjes së kandidaturës të kandidatit Sandër Beci, në vendin vakant për gjyqtar në Gjykatën Kushtetuese, shpallur nga Presidenti i Republikës në datë 13.01.2022, për shkak të tërheqjes së kandidatit nga kandidimi.
2. Në zbatim të nenit 238 të Ligjit nr. 115/2016, ky vendim i njoftohet kandidatit Sandër Beci.
3. Kandidati Sandër Beci ka të drejtën e ankimit në Gjykatën Administrative të Apelit, jo më vonë se 5 ditë nga dita e njoftimit të vendimit të arsyetuar.
4. Ky vendim publikohet në faqen zyrtare të Gjykatës së Lartë, në pjesën e përcaktuar për Këshillin e Emërimeve në Drejtësi.

KRYETAR

Sokol BINAJ



The image shows a handwritten signature in blue ink over a circular official stamp. The stamp contains the text "REPUBLIKA E SHQIPËRISE" at the top, "KËSHILLI I EMËRIMEVE NË DREJTËSI" around the perimeter, and "TIRANË" at the bottom. In the center of the stamp is the coat of arms of Albania, featuring a double-headed eagle. The signature is written in a cursive style and overlaps the stamp.